

1 Joãu

Wãn³txa² a²ka³ten³yau³sxu²

1 Wãn³txa² a²ka³ten³ti³hi¹tē³jau³xa² ũ³wha²li¹lhxã³
 ũ³hũ¹nx2ti³sĩ¹na¹wa². Nxe³sĩ¹na¹jau³xa²sa¹,
 A²wãn³txi³khaix3su² jah¹la² a²ĩ³lxa² ã³xa²
 Je³su²jah³la² a²wi¹lhĩn¹khai¹xu¹tai²nãn²tu³
 txa²wã¹ha³lo²a² yũ²nxa³hi¹nu¹tai²nãn¹ju³tu³
 yxau³te²su² ta¹hxai²hē¹la². Kwẽn¹tai²na²
 yxau³nũn³te²la¹wa². A²nxe³te²a² ain³kxi²,
 txa²wã¹ye³nai²na² ĩ²i², wi¹wi¹nxe² ĩ²sxã³
 txa²wã¹hxi²kai²na² wxa²wxai², nxe³sĩ¹na¹hē³la².
 2 Je³su²jah³la² ã³yũ¹nē³lha³kxai³ ĩ²sĩ¹na¹hē³la².
 Sĩ¹na¹ha²kxai³, ka³te³na² wi¹tãu³a¹
 ĩ³tih³nxe³nx2ti³sĩ¹na¹wa². Ka³te³na² wi¹tãu³kxai³lu²
 A²wĩ³na² yxau³ye²kxe³kxai³ ã³yũt1sa²sĩn¹kxe³kxai³
 ĩ³tih³nxe³nx2ti³sĩ¹na¹wa². 3 ĩ²sĩ¹na¹te²an¹jau³xa²
 so¹lxi³ ain³kxi²sĩ¹na¹te²an¹jau³xa²
 so¹lxi³ ĩ³tih³nxe³nx2ti³sĩ¹na¹wa²,
 Nxe³nx2ti³sĩ¹nha²kxai³, wxa²nũ³ka³txi³xa²
 sa²kxai³lu² ĩ³wet1sah¹lxi³nhĩn¹tu¹wa². Nxe³jut3su²
 A²wĩ³na² Si³yxau³tãu³a¹ ĩ³we¹kĩ³sa²kxai³,
 A²ta²ha² Je³su²jah³la² A²wĩ³na² A²hxi²kan¹ta²
 Si³yxau³tãu³lo³kxah³lo²su² Jah¹la² ĩ³we¹kĩ³sa²kxai³
 nxe³sĩ¹kĩ³tã³la². Nxe³sĩ¹kĩ³sa²kxai³
 wi¹lĩ³we¹yhu¹sĩn¹kĩ³tu¹wa². Nxe³sĩn¹kĩ³jau³nũ³su²
 nxe² e³kxi¹nx2ti³sĩ¹na¹wa². 4 Jã¹nxe³sĩn¹kĩ³te³lhxã³
 wãn³txai²na² ĩ³tih³nxe³nx2ti³sĩ¹na¹wa². ĩ³ka³li³sxã³

ĩ³wi¹lxon³kxi²ta³lun²ki³te³lhxã³ ã³wha²li¹lhxã³
ĩ³tih³nxe³nx2ti³sĩ¹na¹wa².

Sũ³na² ha²te¹ti³hũ³jah¹lo²su²

⁵ Nxe³sĩ¹na¹jau³xa²sa¹, Je³su² Kris²tu³jah¹lai²na²
wãn³txa² ain³kxi²sĩ¹na¹jau³xa²sa¹:

— Txa²wã¹sũ³na² ha²te¹ju³ta² so¹lxi³
te²hũ³jah¹lai²la¹i¹.

Hai³txi³ ka³nxah³ti²hũ³ju³ta³la³
yũ³ti³hex¹jah¹lo²sxa³wi¹. ⁶ Nxe³kxe³kxai³lu¹:

— Txa²wã¹sũ³na² ĩ³we¹jah¹lo²sa¹i¹.

Nxe³kĩ³kxai²nãn²tu³ hau³hau³kon³sxã³

ka³nxah³ti³hũ³ju³ta³la³ ko³nxe³ti³ kãĩ³sxã³

yxau²xai³kĩ³kxai²nãn²tu³ ki³ha³nhĩ³kĩ³tã³la².

Hai³txi³ wain³txi³ wãx³txi³ yxau²xai³lhĩ³kĩ³sxa³wa².

⁷ Yxã¹ta¹ Sũ³na² sa²ha²te¹kxi²nẽ³ju³ta²

yxau²xai³kĩ³kxai²nãn²tu³, Sũ³na² a²ha²tet¹sxã³

yxau²xai³kxa² yã¹nxe³kĩ³kxai²nãn²tu³,

txa²wã¹nũ³ka³txi³kĩ³na¹xai²na² wi¹we¹yhu¹sxã³

yxau³hĩ³kĩ³tã³la². Nxe³kĩ³kxai²nãn²tu³, Sũ³na²

A²ta²ha² Je³su²jah³la² ya³lu²kxi²nẽ³ta¹hxai²hẽ¹la².

A²ti³ha²yau³xa² ha³li³hxa³ta¹hxai²hẽ¹la².

Nxe³ju³tan¹te²kxa³ya³lhu² txa²wã¹ko³nxe³ti³

kãĩ³kĩ³ju³ta² ha³kxa¹ wxa²han³kxi²ti³nẽ³lhĩ³nx²na³la².

⁸ Jã¹nxe³jau³kxai³lu¹:

— Txa²ẽ¹nãu³a¹ ko³nxe³thin¹ju³ta³la³

yũ³te²txã³wi¹. Nxe³kĩ³kxai²nãn²tu³

ĩ³ki³ha¹kxi²nha²hĩ³kĩ³tã³la². Hai³txi³ a²ya³la³tu³

wãn³txi³tu³ yũ³hĩ³kĩ³sxa³wa². ⁹ Yxã¹ta¹

txa²wã¹ko³nxe³ti³ kãĩ³kĩ³ju³ta² ã³ho¹kĩ³sxa³kxe³tu³,

e³lẽ³na² Sũ³na² ĩ³yau¹ũ³nha²ye²kĩ³kxai²nãn²tu³,

Sũ³na² wi¹lhin¹khai¹nxe³sxã³ wain³txi³

kāi³jah¹lai²la¹wa². Nxe³ha²kxai³ txa²wā¹ko³nxe³ti³
 kāi³ki³ju³ta² wxa²wa²su¹tē³lha²kxai³
 txa²wā¹i³lxi³thin¹ki³sxa³ju³ta² whāi²na¹
 wxa²ha³kxi²ti³nē³lha²kxai³ Sũ³na² hxi²ka²
 nxe³nē³lhĩ³nx2na³la².

10 Yxān¹ta¹:

— Ko³nxe³ti³ kāi³a¹ju³ta² yũ³sa²nxa³i¹.
 Nxe³ki³kxai²nān²tu³ Sũ³na² ki³han³jah¹lo²lo³thĩ³ki³tā³la².
 Nxe³ki³kxai²lē¹. Sũ³na² wān³txa² hai³txi³
 txa²wā¹ē¹nāu³a¹ yxau³nē³lhĩ³nx2nxa³wa².

2

Je³su²jah³la² ā³yo²nũ¹nē³jah¹lo²su²

1 Txa²wē³ha³lxi³nāu³xāi³. Ko³nxe³ti³
 kāi³yah³lxin¹kxa²ya³ti³su² ũ³wha²li¹lya³nx2ta¹wa²,
 wān³txai²na²sa³. Nxe³yān¹ta¹ a²nũ²a²
 i²li³te² i³nxa² ko³nxe³ti³ kāi³in¹kxai²nān²tu³,
 Je³su²jah³lo²su² te²an²tu³ Sũ³na² A²hxi²kan¹ta²
 Si³yxau³tāu³lo³kxah³lo²su² ha²kxai³,
 wain³khaix1jah¹lo²su² ha²kxai³ nxe³jah¹lai²la¹wa².
 Ā³yo²nũ¹nx2jah¹lo²nũ³ai²la¹wa². A²nxe³jah¹la²

Sũ³na² Si³yxau³tāu³a¹ ā³yo²nũ¹nxa²lxi³tu¹wa².
 2 A²nxe³jah¹lo²su² te²an²tu³, Je³su²jah³la²
 ya³lu²kxi²nē³lha²kxai³ txa²wā¹ko³nxe³ti³
 kāi³ki³ju³ta² wah³ha² ũ³yho³hi²na²hē³la².
 Nxe³ju³tan¹te²kxa³ya³lhu² yxo²i²ki³kxai²nān²tu³
 txa²wā¹ko³nxe³ti³ kāi³ki³ju³ta² wxa²wa²su¹tē³na³la².
 Txa²wā¹ko³nxe³ti³ kāi³ki³ju³tain²txi³
 wxa²wa²su¹tē³lha²kxai³, a²nũ²a² yxo²ha³kxa¹
 ko³nxe³ti³ kāi³ain¹ju³tain²txi³ whāi²na¹
 wxa²wa²su¹tai¹nha²kxai³ nxe³jah¹lai²la¹wa².

3 Nxe³ai¹nha²kxai³ i³kwa³na³nẽ³jau³xa² ha³kxa¹sa²yo²hau³ko³ki³kxai²nãn²tu³:

— Sũ³na² wi¹lĩ²a¹xã¹. Nxe³ki³jau³su²txa²wã¹ẽ¹nãu³a¹ au³txi³ wi¹ko³nha²hĩ³ki³tã³la².

4 Yxãn¹ta¹ a²nũ²a²ĩ²li³te²su² te²an²tu³:

— Sũ³na² wi¹lĩ²te²sa¹i¹. Nxe³ain¹kxa²ha³ta³nxãn²txi³Sũ³na²ĩ³kwa³na³nẽ³jau³xa²sa²yo²we¹txai¹nxa³kxai²lẽ¹. Ki³han³jah¹lo²sai¹nhĩ³nx2na³la². Hai³txi³

Sũ³na² wãn³txi³tu³ a²ya³la³lyau³tu³nxũ²kwai³yxau³jah¹lo²sai¹nhĩ³nx2nxa³wa².

5-6 Yxãn¹ta¹ Sũ³na² wãn³txa² sa²wai³wait3sxã³sa²yo²hau³ko³ki³kxai²nãn²tu³ Sũ³na² a³lxi²nẽ³lhxã³nxũ²kwai³yxau³khaix1nẽ³lhĩ³nx2na³la². Jã¹nxe³sxã³:

— Sũ³na² ã³nũ²nxi²sxã³ yxau³ye²nha²jah¹lo²sa¹i¹. Nxe³ki³kxai²nãn²tu³ Je³su²jah³la² kãi³kxa²yã¹nxe³sxã³ ã³hxi²so¹ya³sah¹lxi³hẽ¹la². A²nxe³sxã³nxe³ki³kxai²nãn²tu³ ya²la³tu³ Sũ³na² ã³nũ²nxi²sxã³yxau³ye²nha²ki³tã³la².

Wãn³txa² tah²yau³hũ³jau³xa² i³kwa³na³nẽ³jau³su²

7 A³lxi¹nx2ta¹tũ³ka³txãi³. Hai³txi³

tah²yau³la³ Sũ³na² i³kwa³na³nẽ³jau³la³ũ³wha²li¹lyah³nx2ti³nxa³wa². Yxãn¹ta¹ tĩ³yau³xa²

so¹lxi³ i³kwa³na³nẽ³jau³xa² so¹lxi³ wãn³txa²txa²wã¹si³kxã³nãu³u¹ta²na² yũ²sa²tẽ³nx2ti³jau³xa²

so¹lxi³ũ³wha²li¹lyah³nx2ta¹wa², txa²wã¹si³kxã³nãu³u¹ta²nãn¹te²tu³ain³kxi²sa²tẽ³yah³lxin¹jau³xa²sa². 8 Yxãn¹ta¹

wãn³txa² wi¹jau³xa² tah²yau³hũ³jau³xa²i³kwa³na³nẽ³jau³xa²ũ³wha²li¹lyah³nx2ta¹wa².

Nxe³ju³ta²sa¹: Ha³lo²a² ka³nxah³ju³ta²sa²wa³to²kxi²sxã³ hxa³te³lhxã³ nxe³ha²kxai³Sũ³na² ha²te¹khai³ju³ta² kwẽn¹ta²na²

sa²ha²te¹tē³lha²kxai³ nx2na³la². Nxe³sxã³
wãn³txai²na² tah²yau³hũ³jau³xai²la¹wa².
Nxe³jau³xai²na² a²ya³la³lyau³xa² sa²ye³ka¹tē³na³la².
Je³su²jah³la² yxau²xai³ju³tain²txi³ wãn³txai²na²
sa²ye³ka¹tē³lha²kxai³ wxa²nũ³ka³txi³ i³nxai²na²
yxau²xai³lyah³lxin¹ju³tain²txi³ wãn³txai²na²
sa²ye³ka¹ta²lxih³ha²kxai³ nx2na³la².

9 A²nũ²a² i²li³te²su² te²an²tu³:

— Sũ³na² ha²te¹ju³ta² yxau³na¹i¹.

Nain¹kxa²ha³ta³nxã²ti³:

— Txa²wã³tã³xa² yxo²kwĩn¹kxi²sa³nhã¹.

Nain¹kxai²lẽ¹. Hãi¹nxe³sxã³ ka³nxah³ju³ta² so¹lxĩ³
yxau³hĩ³nx2na³la². 10 Jã¹nxe³jut3su² a²nũ²a²

i²li³nũn³te²su² te²an²tu³:

— Txa²wã³tã³xa² a³lxĩ²sa³nhã¹. Nain¹kxai²nãn²tu³

Jah¹la² so¹lxĩ³ Sũ³na² ha²te¹ju³ta²
yxau²xai³jah¹lo²la³hĩ³nx2na³la². A²nxe³jah¹la²:

— Kõ³nxe³ti³ kãi³a¹tũ¹xã¹. Nxe³jau³su²

yũ³jah¹lo²su² hĩ³nx2nxa³wa².

11 Yxã¹ta¹:

— Txa²wã³tã³xa² yxo²kwĩn¹kxi²sa³nhã¹.

A²nũ²a² i²li³te²la³ nxe³kxai²nãn²tu³ kõ³nxe³ti³
kãi³sxã³ yxau²xai³lhĩ³nx2na³la². A²nxe³jah¹la²

yxau²xai³jut3sũ³ju³ta²sa¹. Ka³nxah³ju³ta²

yxau², ka³nxah³ju³ta² ai³li², ka³nxah³ju³ta²

wxa²ye³tĩ¹la³kxi² nxe² yxau²xai³jut3sũ³na³la².

Tĩh³na² wain³tĩh³na² hxi²kan¹txi³ i²jah¹lo²sxa³wa².

Nxe³jut3sũ³nxe² yxau²xai³lhĩ³nx2na³la².

12 Wẽ³ha³lxĩ³nũ³ka³txãi³. Ne³ka²ki²sah¹lxĩ³hẽ¹la².

Wxa²kõ³nxe³ti³ kãi³yah³lxin¹ju³ta²

wxa²wa²su¹txa²lxĩ³tai¹ti²tu³wa². Je³su²jah³la²

ya³lu²kxi²nẽ³ju³tan¹te²kxa³ya³tu³ kõ³nxe³ti³

kāi³yah³lxin¹ju³ta² wxa²wa²su¹txa²lxi³tai¹ti²tu³wa².
 Yah³lxi¹nha²kxai³ ũ³wha²li¹lyah³nx2ta¹wa².
 13 Wī³nu²nāu³xāi³. Ne³ka²ki²sah¹lxi³hē¹la². Jah¹la²
 txa²wā¹si³kxā³nāu³u¹tai²na² yxau²sa²tē³jah¹la²
 wi¹lī²yah³lxi³te²si¹lxa². Nxe³yah³lxi³te²si¹nha²kxai³
 wān³txai²na² ũ³wha²li¹lyah³nx2ta¹wa².
 Sax³ne³lax³ku³nāu³xāi³. Ne³ka²ki²sah¹lxi³hē¹la².
 A²ta³a² kō³nxe³thin¹jah¹lo²khai³su² nū³kxūn³txi³
 ā³sen³sai¹yah³lxi¹nhē³la². Nxe³yah³lxi³te²sin¹jau³su²
 wān³txai²na² ũ³wha²li¹lyah³nx2ta¹wa².
 Wē³hā³lxi³nāu³xāi³. Ne³ka²ki²sah¹lxi³hē¹la².
 Sū³na² Si³yxau³tāu³a¹ wi¹lī²yah³lxi³te²si¹lxa².
 Nxe³yah³lxi³te²si¹nha²kxai³ wān³txai²na²
 ũ³wha²li¹lyah³nx2ta¹wa².

14 Wī³nu²nāu³xāi³. Ne³ka²ki²sah¹lxi³hē¹la².
 Jah¹la² txa²wā¹si³kxā³nāu³u¹tai²na² yxau²xai³jah¹la²
 wi¹lī²yah³lxi³te²si¹lxa². Nxe³yah³lxi³te²si¹nha²kxai³
 wān³txai²na² ũ³wha²li¹lyah³nx2ta¹wa².
 Sa³nxe³lax³ku³nāu³xāi³. Ne³ka²ki²sah¹lxi³hē¹la².
 Nū³kxūn³yah³lxi³te²si¹nha²kxai³, Sū³na²
 wān³txa² nxū²kwai³yxau³nx2ti³ha²kxai³,
 kō³nxe³thin¹jah¹lo²khai³su² nū³kxūn³txi³
 ā³sen³sai¹yah³lxi¹nha²kxai³ yah³lxi³te²si¹lxa².
 Nxe³yah³lxi³te²si¹nha²kxai³ wān³txai²na²
 ũ³wha²li¹lyah³nx2ta¹wa². 15 Na¹jau³xai²na²sa¹,
 kō³nxe³ti³ kāi³ain¹tū³kā³txa² yxau²xai³lain¹kxa²
 yā¹nxe³jut³su² ten³yah³lxi³txa³hē¹la².
 Te²yā¹nxe³sxā³ kō³nxe³ti³ kāi³sxā³
 yxau²xai³lain¹kxa²yā¹nxe²kāi³ti³ten³yah³lxin¹kxai²nān²tu³
 hxi²kan¹ti³Txa²wā¹sū³na²a³lxi²yah³lxi³hū³nx2nxa³lxa².
 16 Nxe³yah³lxi¹nha²kxai³ kō³nxe³ti³
 kāi³ain¹tū³kā³txai²na² yxau²xai³lain¹ju³ta² hai³txi³

Txa²wã¹sũ³na² a²ten³jut3sxa³wa². Kō³nxe³thin¹sxã³
 kã³ju³ta² ya³ni³li³yah³lxin¹kxai²nãn²tu³
 Txa²wã¹sũ³na² a²ten³jut3sxa³wa². Ī²li³ju³ta²
 kō³nxe³ti³ yxo²kwain³yah³lxin¹kxai²nãn²tu³
 Txa²wã¹sũ³na² a²ten³jut3su² nũ³nxa³wa².
 Yxau²xai³yah³lxin¹ju³tai²na² yxo²kãin²ti³nha²sxã³
 ĩ³ye³kxi²nyhah¹lxin¹kxai²nãn²tu³ hai³txi³
 Txa²wã¹sũ³na² a²ten³jut3sxa³wa². Ju¹tai²na²
 ha³kxa¹ kō³nxe³ti³ kã³ain¹tũ³ka³txa²
 yxau²xai³lain¹ju³tai²la¹wa². 17 Nxe³kxe³su² kō³nxe³ti³
 kã³ain¹tũ³ka³txai²na² yxau²xai³lain¹ju³ta² hxa³ni²
 ya³ni³lain¹ju³ta² hxa³ni² nxe³tu¹wa². Nxe³to³ta¹
 Txa²wã¹sũ³na² a²ten³jau³xa² sa²yxo²we¹te²su²
 te²an²tu³ hxa³nxa³kxe³su² yxau²xai³lain¹tu¹wa².

Je³su²jah³la² ĩ³kox1kō¹son²kxi²jah¹lo²su²

18 Txa²wẽ³ha³lxin³nãu³xã³. Ha³lo²ai²na²
 hxa³je³na³kxa² yau³son³na³la². Yau³son³kxe³su²
 Je³su² Kris²tu³jah¹la² ĩ³kox1kō¹son²kxi²jah¹lo²su²
 jah¹la²:

— Je³su²jah³la² yxo²kwĩn¹kxi²na¹nhã¹.
 Nxe³jah¹lo²su² jah¹la² wxã³kxe²ya¹nhẽ³tu¹wa².
 Wxã³kxe²ya¹nhẽ³ju³ta³nũ³a² ain³kxi²yah³lxin¹tai¹ti²tu³wa².
 Nxe³jut3su² kō¹kō¹xa²nũ³ka³txa²:

— Je³su²jah³la² yxo²kwĩn¹kxi²na¹nhã¹.
 Te²yã¹nxe³tũ³ka³txa² kã³li²ti³ka³txa²
 wxã³kxe²ya³nhẽ³lain¹tai¹ti²tu³wa².
 Nẽ³lai¹nha²kxai³, ha³lo²ai²na² hxa³te³lhã³
 nxe³ju³ta²nũ³a² a³la³kxi²ki³tã³la².

19 A²nxe³tũ³ka³txa² kō¹kōn¹tũ³ka³txai²lẽ¹.
 Ā³na¹nẽ³lain¹sxã³ a³li³ain¹tai¹ti²tu³wa².
 Hai³txi³ txa²wã¹yũ¹ti³sai¹nxa³wa².

Txa²wã¹yũ¹ti³sain¹te²la³te²kxai³ã³na¹nẽ³lai¹nhĩ³nx2nxa³wa².
 Hã¹nxe³sxã³ã³nũ²ti²sxã³yxau³ya³nhẽ³lai¹nhĩ³nx2na³la².
 Yxãn¹ta¹ã³na¹nẽ³lain¹tai¹ti²tu³wa². Ai¹nha²kxai³
 txa²wã¹yũ¹ti³sai¹nxa³jau³su² nxẽn³tain¹na³na¹.
 Nxain¹jau³su²a³la³kxi²kĩ³tã³la².

20 Yxãn¹ta¹ Je³su²jah³la² hxi²ka²
 wi¹lhin¹jah¹la² hxi²ka² Sũ³na² Yãu³ka³jxah¹la²
 ã³nxũ²kwai³wi¹nx2ti³tai¹ti²tu³wa². Yah³lxĩ¹nha²kxai³
 a²yen³kxa² ha³kxa¹ a³la³kxi²ta³lun²yah³lxĩ¹lxa².

21 Û³wha²li¹lyah³nx2ta¹ju³tai²na² wãn³txa²
 a²ya³la³lyau³tu³ jau³xa² wxa²nũ³ka³txa²
 wi¹kõ³nhyah¹lxĩn¹kxe³kxai³ ã³wha²li¹lyah³nx2ta¹wa².
 Hai³txi³ wãn³txa² wi¹kõ³nhyah¹lxan³ju³ta³la³
 ã³wha²li¹lyah³nx2ti³nxa³wa². Jã¹nxe³jut3su²
 ki³han³jah¹lo²su² te²a² hai³txi³ Sũ³na²
 Wain³jah¹lo²khai³xa² a²sa³wit3sxa³wa². Ju¹ta²
 wi¹kõ³nhyah¹lxĩ³nũ³nĩ¹lxa².

22 Ki³han³jah¹lo²khai³su²e³te³nah¹lxĩ¹:

— Hai³txi³ Je³su²jah³lo²la³ Sũ³na²
 A²hxi²kan¹ta² Si³yxau³tãu³lo³kxah³lo²su²
 ti³he¹nx2nxa³i¹. Ai¹nhxai²na²hẽ³la². A²nxe³jah¹la²
 ki³han³jah¹lo²khai³xai²la¹wa². Te²su² Sũ³na²
 A²ta²ha² ĩ³kõx1kõ¹son²kxi²jah¹lai²la¹wa².
 A²nxe³jah¹lo²su² te²kxai³lu² Txa²wã¹sũ³na²
 Si³yxau³tãu³ain²txi³ e²nha²kxai³ A²ta²hain²txi³
 e²nha²kxai³ nxe³jah¹lai²la¹wa². 23 A²nũ²a²ĩ²li³te²su²
 te²an²tu³:

— A²ta²ha² Je³su²jah³la² e²na¹xã¹.
 Nxe³kxai²nãn²tu³ hai³txi³ Txa²wã¹wĩ³na²
 yxau³kxi²jah¹lo²su²hĩ³nx2nxa³wa².

Yxãn¹ta¹a²nũ²a²ĩ²li³nũn³te²su²te²an²tu³:

— A²ta²ha² yxo²ĩ²a¹xa¹. Nxe³kxai²nãn²tu³
Txa²wã¹wĩ³na² yxau³kxi²jah¹lo²su² hĩ³nx2na³la².

24 Nxe³ha²kxai³ wãn³txa² kxã³nhxĩ¹nu¹tai²nãn¹jau³xa²
ain³kxi²sa²tẽ³kxah¹lxin¹jau³xan²tu³
ũ³nhũ²kwai³wxe³nhat1jah³lxi³hẽ¹la². Nxe³jau³xai²na²
ũ³nhũ²kwai³wxe³nhyah¹lxin¹kxai²nãn²tu³,
A²ta²hain²txi³ã³nũ²ti²sxã³ yxau³ye²nyhah¹lxi¹nha²kxai³,
A²wĩ³na² Si³yxau³tãu³ain²txi³ ã³nũ²ti²sxã³
yxau³ye²nyhah¹lxi¹nha²kxai³ nxe³nyhah¹lxin¹tu¹wa².
25 Nxe³nyhah¹lxin¹ju³ta² ka³te³na² wi¹tãu³a¹
Je³su²jah³la² ĩ³ye³ũ¹nhẽ³tai¹ti²tu³wa².

26 Wãn³txai²na² ũ³wha²li¹lyah³nx2ta¹wa². A²nũ²a²
ĩ³ki³ha¹kxi²sa²kex3so¹nx2ti³te³lhxã³ o²la³kxain¹na³la².
Ãn³kex3tũ³ain¹yah³lxin¹kxa²yã³ti³su²
ĩ³tih³nxe³nx2ta¹wa². 27 Yxãn¹ta¹ Txa²wã¹sũ³na²
Yãu³ka³jxah¹la² Je³su²jah³la² ũ³hũ¹nx2ti³kxah³lo²su²
jah¹la² nxũ²kwai³yxau³nx2ti³na³la². A²nxe³jah¹la²
a²yen³kxa² yxo²ha³kxa¹ ĩ³yau¹ũ³nx2ti³jah¹lai²la¹wa².
Wãn³txi³khai³xa² so¹lxi³ ĩ³yau¹ũ³nx2ti³jah¹lai²la¹wa².
Hai³txi³ ki³han³jah¹lo²sxa³wa². Yah³lxi¹nha²kxai³
a²nũ²a² ã³xa² ĩ³yau¹ũ³nx2ti³jah¹lo²nũ³a²
yũ³nx2ti³xa³kxa²ha³tã³nxãn²txi³ a²yen³kxa²
yxo²ha³kxa¹ a³la³kxi²yah³lxi³hĩ³nxa¹lxa².
Yah³lxi¹nha²kxai³ Txa²wã¹sũ³na² Yãu³ka³jxah¹la²
wãn³txa² sa²yxo²wet1sxã³ Je³su²jah³la² ã³nũ²ti²sxã³
yxau³nha²je¹jah¹lxi³hẽ¹la².

28 Txa²wẽ³ha³lxi³nãu³xãĩ³. Je³su²jah³lo²kxai³lu²
ã³nũ²ti²sxã³ yxau³nha²je¹jah³lxi³hẽ¹la².
Nyhah¹lxin¹kxai²nãn²tu³ Txa²wã¹hxi²kan¹ta²
Si³yxau³jah¹la² wxã³sxã³ ã³yũ¹nĩ³tãu³a¹
hxi²ka¹ka¹nha²sxã³ yxau³nha²ye²yah³lxi³hĩ³nxa¹lxa².

Hai³txi³ ke³kon³ki²sxã³ ãu²li²yah³lxi³hĩ³nx2nxa³lxa².
 29 Jã¹nxe³jut3su²:

— Txa²wã¹sũ³na² Wain³ta² Si³yxau³jah¹lo²su²
 na³na¹. Nxe³jau³xa² wi¹ko³nhyah¹lxi¹lxa².
 Yah³lxi¹nha²kxai³ a²nũ²a² wain³txi³ kãĩ³sxã³
 yxau²xai³te²su² te²yxoxo²ha³kxa¹ Txa²wã¹sũ³na²
 wẽ³ha³lxi³sain¹na³na¹. Nxe³jau³xai²na²
 wi¹ko³nhat1jah³lxi³nũ³nhẽ¹la².

3

Txa²wã¹sũ³na² wẽ³ha³lxi³su²

1 Txa²wã¹wĩ³na² kãĩn² a³lxi²khaix1nẽ³na³la².
 Nxe³nẽ³ju³ta² ĩ²jah¹lxi³hẽ¹la². Kãĩn²
 a³lxi²khaix1nẽ³lha²kxai³ Sũ³na² wẽ³ha³lxi³lo³tẽ³na³la².
 Nẽ³lha²kxai³ Sũ³na² a²wẽ³ha³lxi³su² ki³tã³la²,
 kwẽn¹tai²nah¹lxa². Nxe³ki³sa²kxai³
 ko³nxe³thin¹ko³xai²nãn¹tũ³ka³txai²li²
 wi¹ĩ²nẽ³lai¹nx3tho³la², Txa²wã¹wĩ³na²
 wi¹ĩ²ai¹nxa³ha²kxai³la². 2 Txa²wã³tã³nãu³xãĩ³.
 A³lxi¹nx2ta¹tũ³ka³txãĩ³. A²ha¹ kwẽn¹tai²na²
 Sũ³na² wẽ³ha³lxi³su² ki³tã³la². Yxãn¹ta¹
 yxan¹nãu³a¹ ĩh¹nxe³nxũ²xi³khai¹nxe³sxã³
 yxau²xai³lhĩ³ki³te³ji¹ku². Nxe³ki³nha²wa².
 Nxe³ki³kxa² ha³ta³nxãn²txi³ yxan¹nãu³a²
 Je³su²jah³la² ã³yu¹nẽ³te³nãu³a¹ Je³su²jah³la²
 nẽ³te²hũ³kxa² yã¹nxe³ki³tu¹wa², a²ya³la³tu³
 Sũ³nu²khai³xa² txa²wã¹ye³na² waun³ta³ki²la²
 ĩ²ki³sa²kxai³la². 3 Nxe³nẽ³jau³nũ³su²
 wi¹ko³nha²ki³tã³la². Nxe³ki³kxai²nãn²tu³ jau¹xai²na²
 ain³kxi²sxã³ yxau²xai³ki³tũ³ka³txi³ ki³na¹xai²na²
 hãĩ¹nxe³ta¹ ko³nxe³ti³ kãĩ³sxã³ yxau²xai³ki³ju³ta²
 ã³na¹sxã³ ã³waix3kxi²so¹nha²hxĩ³ki³tã³la²,

Je³su²jah³la² Wain³txa² Si³yxau³jah¹lo²su²
ha²kxai³la².

4 Jã¹nxe³jut³su² ko³nxe³ti³ kãi³kĩ³kxai²nãn²tũ³
Sũ³na² ĩ³kwa³na³nẽ³jau³xa² sa²yo²ã³i²
yxau²xai³lhĩ³kĩ³tã³la². Ko³nxe³ti³
kãi³kĩ³ju³tain²txi³ Sũ³na² sa²yo²ã³kĩ³ju³tain²txi³
te²ju²hẽ³la². 5 Yxãn¹ta¹ ko³nxe³ti³

kãi³kĩ³ju³ta² wxa²hxan³kxi²nẽ³te³lhxã³
Je³su²jah³la² wxã³kxi²nẽ³na²hẽ³la².
A²nxe³jah¹la² hai³txi³ ko³nxe³ti³ kãi³ju³ta³la³
yũ³ti³hex¹jah¹lo²sxa³wa². Jau¹xai²na²

wi¹ko³nhyah¹lxi¹lxa². 6 Nxe³ha²kxai³ Je³su²jah³la²
ã³nũ²kxi²sxã³ yxau²xai³nha²ye²kĩ³kxai²nãn²tũ³
ko³nxe³ti³ kãi³sxã³ yxau²xai³kĩ³ju³ta³la³
yũ³nẽ³lhĩ³nx²nxa³wa². Yxãn¹ta¹ ko³nxe³ti³ kãi³sxã³
yxau²xai³kĩ³kxai²nãn²tũ³, hai³txi³ Je³su²jah³lo²la³
wi¹lĩ²kĩ³sxa³ha²kxai³, hai³txi³ txa²wã¹ẽ¹nãu³la³
Je³su²jah³lo²la³ a³la³kxi²kĩ³sxa³ha²kxai³
nxe³hĩ³kĩ³tã³la².

7 Txa²wẽ³ha³lxiã³. A²nũ²a² ã³xa²
ĩ³kĩ³ha¹kxi¹nx²ti³sxã³ ã³ke³tũ¹nx²ti³ha³ta²wa²
A²nxe³jah¹la² yxo²ĩ²yah³lxi³txa³hẽ¹la². A²nũ²a²
wain³txi³ kãi³sxã³ yxau²xai³kxai²nãn²tũ³
si³ka³ka³kxi² wain³jah¹lo²su² te²ju²hẽ³la².
Je³su²jah³lo²kxai³lu² Wain³ta² Si³yxau³jah¹lo²su²
te²ju²hẽ³la². Nxe³kxa² yã¹nxe³kxe³hũ³sxã³ wain³txi³
kãi³sxã³ yxau²xai³kxai²nãn²tũ³ Je³su²jah³la² yã¹nxe²
wain³jah¹lo²su² nũn³te²ju²hẽ³la². 8 Yxãn¹ta¹
ko³nxe³ti³ kãi³sxã³ yxau²xai³te²nãn²tũ³ a²ta³a²
sa³wi³sa² te²ju²hẽ³la², a²wi¹lhĩn¹khai¹xu¹ta²na²
a²ta³a² ko³nxe³ti³ kãi³sa²tẽ³jah¹lo²su² ha²kxai³la².

Ain¹sxã³ a²yen³kxa² a²ta³a² hxi²ka² kãi³kxa²
a²yo²ha³kxa¹ ko³nxe³khaix¹te²ju²hẽ³la². Yxã¹ta¹
Txa²wã¹sũ³na² A²ta²ha² Je³su²jah³la² wxã³na²hẽ³la².
Ain¹sxã³ a²ta³a² kãi³kxe³su² te²yen³kxa² ha³kxa²
wxa²hxa³te³lhxã³ Je³su²jah³la² wxã³na²hẽ³la².

9 A²nũ²a² Txa²wã¹sũ³na² tah²lxi³
we¹kxe³su² te²an²tu³ hai³txi³ ko³nxe³ju³ta³la³
kãi³sxã³ yxau²xai³te²sxa³yu²hẽ³la²,
Txa²wã¹sũ³na² Wi¹lhin¹te² Si³yxau³tãu³a¹
nxũ²kwai³yxau³ye²ha²kxai³la². A²nxe³te²su²
hxi²kan¹txi³ ko³nxe³ju³ta³la³ kãi³sxã³
yxau²xai³yu³te²sxa³yu²hẽ³la², Txa²wã¹sũ³na²
tah²lxi³ we¹kxe³su² ha²kxai³la². 10 Sũ³na²
wẽ³ha³lxa² ha³na³ka³lxi³ wi¹ko³nha²ha²kxai³, a²ta³a²
wẽ³ha³lxa² ha³na³ka³lxi³ wi¹ko³nha²nũ³nha²kxai³,
nxe³te²ju²hẽ³la². Wi¹ko³nha²ki³te³nah¹lxi¹,
a²nũ²a² ĩ³lxi²te²su² te²an²tu³ wain³txi³
kãi³ai¹nxa³kxai²nãn²tu³ hai³txi³ Sũ³na²
wẽ³ha³lxi³sain¹te²sxa³yu²hẽ³la². Te²yã¹nxũn³sxã³:

— Txa²wã³tã³xa² a³lxi²sa²nxã³nhã¹.
Nain¹kxai²nãn²tu³ hai³txi³ Sũ³na²
wẽ³ha³lxi³su²nũn³te²sxa³yu²hẽ³la². Jau¹xai²na²
wi¹ko³nha²hĩ³ki³tã³la².

A³lxi²waun¹nyhu¹ki³jau³su²

11-12 Wãn³txa² txa²wã¹si³kxã³nãu³u¹tai²nãn¹jau³xa²sa¹,
ain³kxi²sa²tẽ³yah³lxi¹jau³xa²sa¹:

— A³lxi²waun¹yha¹sah¹lxi³hẽ¹li¹.

Nxe³ta¹hxai²ti³ai¹ti²tu³wa². Hai³txi³
Ka³ĩ²ah³lo²nu¹tai²na² yxau²xai³kxu¹jã¹nxe³yah³lxi³txa³hẽ¹la².
Sa³ta³na²jah¹la² a²sa³wit³su² ta¹hxai²hẽ¹la².
A²nxe³jah¹lo²nu¹tai²na² sa²kxai³lu² a²lo³na²

ĩ³su²lhã³ta¹hxai²ti³ai¹ti²tu³wa². ĩh¹nxe³kxa²yan³ti³ta³
 nũh¹ a²lo³na² ĩ³su²lhã³ta¹hxai²te²sẽ¹na²? Nxe³ju³ta²
 a²lo³na² wain³txi³ kãĩ³ha²kxai³ a²ka³na³na²
 sa²kxai³lu² Ka³ĩ²ah³lo²nu¹taĩ²na² sa²kxai³lu²
 ko³nxe³ti³ kãĩ³ha²kxai³ nxe³ye²yhu¹kxan²ta¹,
 a²lo³na² ĩ³su²lhã³yha¹ta¹hxai²ti³ai¹tu³wa².
 Jã¹nxe³yhah¹lxi³txa³hẽ¹la².

13 Txa²wã³tã³nãũ³xãĩ³. Ne³ka²ki²sah¹lxi³hẽ¹la².
 Ko³nxe³thin¹sxã³ kãĩ³sxã³ yxau²xai³lain¹tũ³ka³txa²
 ten³nx2txai¹nxa³jut3su²ĩ³wã³wã³txi³yhah¹lxi³txa³hẽ¹la².

— ĩh¹nxe³kxa²yan³ti³ta³ten³nẽ³lain¹to²hxa³ye²sin²ta²ku²
 ain¹ki³nhai¹. Nxe³yah³lxi³txa³hẽ¹la².

14 Kxã³nxai³kxai³ ya³lu²te²hũ³nxe²
 yxau²xai³ki³taĩ¹ti²tu³wa². Yxã¹ta¹
 Je³su²jah³la² yxo²ĩ²ki³sĩ¹na² ka³ten³nhũ³nxe²
 a²ha³ti³sai¹ki³taĩ¹ti²tu³wa². Ju¹taĩ²na²
 wi¹ko³nha²ki³tã³la². Txa²wã³tã³nãũ³xa²
 a³lxi²waun¹nyhu¹ki³sa²kxai³ wi¹ko³nha²ki³tã³la².
 Nxe³yã¹ki³ta¹txa²wã³tã³xa² a³lxi²waun¹nyhu¹ki³sxa³kxai²nã²tu³
 ya³lu²te²hũ³sxã³ yxau²xai³lhĩ³ki³tã³la².

15 Jã¹nxe³sxã³:

— Txa²wã³tã³xa²ten³nxa³nhã¹. A²nxe³jah¹lo²su²
 kxai²nã²tu³, su²lhã³nha¹kxa² yã¹jah¹lo²su²
 hĩ³nx2na³la². Nxe³jut3su² hai³txi³
 su²lhã³jah¹lo²la³ ka³tẽ³na² wi¹tãũ³a¹
 yxau²xai³ti³hex1jah¹lo²su² hĩ³nx2nxa³wa².
 Nxe³jau³xai²na² wi¹ko³nhyah¹lxi¹lxa². 16 Je³su²jah³la²
 ya³lu²kxi²nẽ³na²hẽ³la². Ka³tẽ³na² wi¹tãũ³a¹
 ũ³hũ¹nẽ³te³lhã³ã³na¹nẽ³na²hẽ³la². Nxe³sã²sxã³
 ya³lu²kxi²nẽ³na²hẽ³la². Nxe²kãĩ³kxi²nẽ³lhã³
 tah²yu³ta³lxi³ a³lxi²waun¹yhu¹ki³ju³ta²
 ĩ³yau¹ũ³nhẽ³na²hẽ³la². Jã¹nxe³sxã³

a³lxi²waun¹yha¹sah¹lxi³hē¹la². Nxe³ki³sa²kxai³
txa²wā¹ka³ten³yu³ta² nxū²kwai³yū³nē³kxe³su²
te²a² ā³na¹sxā³, txa²wā¹wā³tā³nāu³xa²
ya³lu²kxi²nūh¹ki³si¹nhē³jau³nū³su², Sū³na²
ĩ³ye³kxi²nē³kxai²nān²tu³, sa²yxo²we¹ja³sah¹lxi³hē¹la².
17 Jā¹nxe³jau³su² a²nū²a² yen³kxa² yū³te²su²
te²an²tu³:

— Txa²wā³tā³xa² toh³la³kxi²nha² yxau³ain¹nhā¹.
Yxān¹tah¹lxi³na¹ sa²hau³ko³tai¹na¹ju³ta²
ten³sa²nxa³nhā¹. Nxe³kxai²nān²tu³
a²yen³kxi³jah¹lai²nān²tu³ hai³txi³ Sū³na²
a³lxi²nē³kxa² yā¹nxe³sxā³ kãi³jah¹lo²su²
ti³he¹nx2nxa³wa². 18 Txa²wē³ha³lxi³nāu³xāi³
Ne³ka²ki²sah¹lxi³hē¹la². Kwa²txa²wā¹yxo²a² so¹lxi³
a³lxi²waun¹yhu¹jau³la³ ĩ³ye³ya³sah¹lxi³txa³hē¹la².
A²ya³la³lyau³tu³ a³lxi²waun¹yhu¹ki³jau³xa²
txa²wā¹hxi²ka²whāi²na¹wi¹hxi²kāi³yha¹sah¹lxi³hē¹la².

Txa²wā¹sū³na²yen³nāu³a²ĩ³nxū²kwai³lxū¹nē³jau³su²

19 Nxe³ki³kxai²nān²tu³:

— Sū³na² wain³khai³nxe³jah¹la²
a²wē³ha³lxi³syu¹ki³tā³na¹. Nxe³jau³xai²na²
wi¹ko³nha²hĩ³ki³tā³la². Nxe³sxā³
Txa²wā¹sū³na² yen³nāu³a¹ ā³wxe³nū¹nhē³lhxā³
yxau²xai³ki³tā³la². 20 Yxān¹ta¹
txa²wā¹ē¹nāu³a¹ ĩ³ye³kxi²nha²ki³kxai²nān²tu³,
ko³nxe³thin¹si¹nhē³jau³su² ĩ³ye³sxā³
ko³nxe³ti³ ĩ³yĩ¹li²nhē³kxa² ha³ta³nxān²txi³,
Txa²wā¹sū³na² ā²la² kãin²khai¹nxe³sxā³
a²yen³kxa² ha³kxa¹ a³la³kxi²khaix1jah¹lai²la¹wa².
Txa²wā¹ē¹na² ten³sa²wa²tot1sai¹nē³lhxā³
a³la³kxi²khaix1jah¹lai²la¹wa². 21-22 A³lxi¹nx2ta¹tū³kã³txãi³.

Ne³ka²ki²sah¹lxi³wxa². Txa²wã¹ẽ¹nãu³a¹
 kō³nxe³thin¹si¹nhẽ³jau³su²ĩ³ye³kxi²nha²ki³sxa³kxai²nãn²tu³,
 hxi²ka¹ka¹nha²la² Txa²wã¹sũ³na² yen³nãu³a¹
 yxau²xai³lhĩ³ki³tã³la². Nxe³ki³kxai²nãn²tu³
 a²yen³kxa² ĩ²li³ki³kxa² ĩ³wã³txi³sain³ki³kxa²
 yxo²ha³kxa² ũ³yhen³kxi²nẽ³lxai¹nhĩ³nx2na³la².
 Txa²wã¹sũ³na² ĩ³kwa³na³nẽ³jau³xa²
 sa²wai³wait3sxã³ sa²yo²we¹ki³si², hã¹nxe³sxã³
 ĩ³wi¹lxon³kxi²ki³si¹jau³su² kã¹ki³si²,
 nxe³ki³sa²kxai³la². 23 ĩ³kwa³na³nẽ³jau³xa²sa¹.
 Je³su²jah³la² Txa²wã¹sũ³na² A²ta²ha² Txa²wã¹sũ³na²
 A²hxi²kan¹ta² Si³yxau³tãu³lo³kxah³lo²su²
 te²a² yxo²ĩ²i², txa²wã¹wã³tã³nãu³xai²na²
 a³lxi²waun¹yhu¹i² nxe³ya³sah¹lxi³hẽ¹la².
 Nxe³ki³jau³su² nxe³nẽ³lain¹ta¹hxai²ti³ai¹ti²tu³wa².

24 — Txa²wã¹sũ³na² ĩ³kwa³na³nẽ³jau³xa²
 sa²yo²we¹ta¹xã¹. Nxe³ki³kxai²nãn²tu³ Sũ³na²
 yxau²xai³lye²ki³sa²kxai³ yxau²xai³lye²nẽ³nũ³nha²kxai³
 nxe³hĩ³nx2na³la². Nxe³kxai²nãn²tu³
 Txa²wã¹sũ³na² Yãu³ka³jxah¹la² ũ³hũ¹nẽ³lhxã³
 nxũ²kwai³yxau³nẽ³ju³tan¹te²ka³ya³lhu² Sũ³na²
 yxau²xai³lye²nẽ³ju³ta² wi¹kō³nha²ki³tã³la².

4

*Ya²la³lyau³su² ta³nxa² ki³han³jau³su² ta³nxa²
 a³la³kxi²ki³jau³su²*

1 A³lxi¹nx2ta¹tũ³ka³txã³. Wãn³txa² ĩ²li³jau³xa²
 yxo²ĩ²yah³lxi³sãn²txa³hẽ¹la². Yah³lxin¹kxa²ya³ti³su²
 ĩ³hau³kot3sxĩ²jah¹lxi³sã²nhẽ³la².

— Sũ³na² wãn³txi³khai³su² ta³nxa², kwa²
 ha³na³ka³lxi³ ã³lxi³jau³su² ta³nxa² nẽn³tã¹.

Nxe³jah³lxi³hē¹la². Ki³han³tũ³ka³txa² Sũ³na²
wãn³txa² ain³kxi²ki³lxo³nxe³sxã³ ĩ³ye³tũ³ka³txa²
kã²li³te²nũ³ka³txa², ha³lo²ai²na² wxã³sxã³
yxau³sxã³ ĩ³ye³kxi²nē³lain¹to³nha³la². Nxe³ha²kxai³
nxe³jah³lxi³hē¹la². ²Ī³hau³kot3sxĩ²yah³lxin¹ju³ta²sa¹:

— Je³su²jah³la² Sũ³na² A²hxi²kan¹ta²
Si³yxau³tãu³lo³kxah³lo²su² na³li¹.
Te²a² txa²wã¹nũ²ai²na² wxen¹nũ²la²
yuh³xai²nãn¹ta³ko³xai²na² wxã³ta¹hxai²hē¹li¹.
A²nxe³jau³xai²na² a²nũ²a² ĩ³ye³kxai²nãn²tu³
nxe³te²a² so¹lxi³, Sũ³na² Yãu³ka³jxah¹la²
nxũ²kwai³yxau³jah¹lai²la¹wa². ³Yxãn¹ta¹
nxe³jau³xai²na² sa²yo²ã³jah¹lo²su² kxai²nãn²tu³
hai³txi³ Sũ³na² ĩ³sa²si¹hã³kxah³lo²su²
ti³he¹nx²nxa³wa². Sũ³na² ko¹ko¹nũ³ka³txi³sai¹nhĩ³nx²na³la².
A²nxe³tũ³ka³txa² ã³wxã³ye²nē³lhi¹hain¹jau³nũ³su²
kxã³nxai³tã² ain³kxi²yah³lxin¹tai¹ti²tu³wa². Yxãn¹ta¹
kwẽ¹tai²na² ã³yũ¹nē³lain¹na³la².

⁴ Ye²nē³lain¹kxa² ha³ta³nxãn²txi³
txa²wẽ³ha³lxi³ ĩ³nxai²na² Txa²wã¹sũ³na²
wẽ³ha³lxi³syah¹lxi¹nha²kxai³ nũ³kxũn³txi³ Sũ³na²
ko¹ko¹nũ³ka³txai²na² ã³sen³sai¹ain¹yah³lxi³te²si¹lxa².
Nxũ²kwai³yxau³nx²ti³jah¹la² nũ³kxũn³sxã³
kãin²na³la². Yxãn¹ta¹ a²ta³a² ha³lo²ai²na² he¹jah¹la²
ko¹ko¹nũ³ka³txa² nxũ²kwai³yxau³yain¹jah¹la²
kã²nxa³wa². Nxe³ha²kxai³ yah³lxi³te²si¹lxa².
⁵ Kox¹ko¹xã²nũ³ka³txai²na² a²si³yxau³tãu³a¹
ko³nxe³ti³ kã³sxã³ yxau²xai³lain¹te² ha³lo²ai²la¹wa².
Nxe³ha²kxai³ ko³nxe³ti³ kã³sxã³ yxau²xai³lain¹te²
yen³kxa² so¹lxi³ ĩ³ye³kxain¹tũ³ka³txai²la¹wa².
Nxe³ain¹jau³su², ko³nxe³ti³ kã³sxã³

yxau²xai³lain¹tũ³ka³txa² ne³ka²kain¹na³la².
 6 Yxãn¹ta¹ txa²wã¹nũ³ka³txai²na² Txa²wã¹sũ³na²
 wẽ³ha³lxi³su² ki³tã³la². Ki³sa²kxai³ txa²wã¹wãn³txa²
 sa²kxai³lu², a²nũ²a² Sũ³na² wi¹lĩ²nhain¹tũ³ka³txa²
 hã¹nxe³ti³xa¹ ain³kxi²nẽ³lai¹nha²kxai³,
 ha³na³ka³lxi³ Sũ³na² wi¹lĩ²ai¹nxa³tũ³ka³txai²lẽ¹.
 Ain³kxi²nẽ³lai¹nxa³ha²kxai³ nxe³te²ju²hẽ³la².
 Nxe³jau³su² Sũ³na² wãn³txa² ya³la³lyau³xan²tũ³
 wãn³txi³tũ³ a²e³te²su² te²a² ha³na³ka³lxi³
 a³la³kxi², ki³han³jau³tũ³ ã³ke³tũ¹si¹nhẽ³jau³xan²tũ³
 a²e³te²su² te²lẽ¹ ha³na³ka³lxi³ a³la³kxi² nxe²
 i³ye³ka¹thĩ³ki³tã³la².

Txa²wã¹sũ³nu²kxai³lu² a³lxi²nyhu¹ki³ju³ta²
a²wa³kxẽn³yah³lo²su²jau³su²

7 A³lxi¹nx2ta¹tũ³ka³txã³. A³lxi²waun¹yha¹sah¹lxi³hẽ¹la²,
 Txa²wã¹sũ³na² a³lxi²yhu¹tĩh³na²
 a²wa³kxẽn³yah³lo²su² ha²kxai³la². Nxe³ju³ta²kxai³
 Sũ³na² wẽ³nhĩ³nẽ³kxe³su² ki³sa²kxai³
 Sũ³na² wi¹lĩ²nha²ki³sa²kxai³ nxe³hĩ³ki³tã³la².
 Nxe³ki³kxai²nãn²tũ³:

— A²nũ²a² ã³xa² ta³nxa² Sũ³na² ta³nxa²
 a³lxi²na¹nhã¹. Nxe³ki³kxai²nãn²tũ³ Sũ³na²
 a³lxi²yhu¹ti³hi¹tẽ³jau³su² a³lxi²yhu¹hĩ³ki³tã³la².

8 Txa²wã¹sũ³na² kã³to³ju³ta² hã¹nxe³sxã³
 a³lxi²jau³su² kã³jah¹lai²la¹wa². Nxe³ha²kxai³ a²nũ²a²
 i²li³te²lxi³ a²ẽ¹nãu³a¹ i³ye³kxi²nha²kxai²nãn²tũ³:

— A²nũ²a² ã³xa² a³lxi²sa²nxã³nha¹.
 A²nxe³jah¹lo²su² kxai²nãn²tũ³ hai³txi³
 Txa²wã¹sũ³na² wi¹lĩ²nha²jah¹lo²su²
 ti³hex1hĩ³nx2nxa³wa². 9 Txa²wã¹sũ³nu²su²te²kxai³lu²
 A²ta²ha² a²hã¹nxe³te²lxi³ wẽ³nhĩn³kxe³su² te²a²
 ha³lo²ai²na² i³sa²si¹hã³ũ¹nhẽ³ta¹hxai²hẽ¹la².

Nxe³nê³lha²kxai³ A²ta²hai²na² ĩ³hau³ko³tũh¹te²su²
 kxan²ta² ka³te³na² wi¹tãu³a¹ e³le³na¹
 yũ³si¹nhê³na³la². Nxe³lha²kxai³ Txa²wã¹sũ³na²
 a³lxi²nê³jau³su² ãn³yã³yũ¹nê³ta¹hxai²hê¹la².
 10 Jã¹nxe³sxã³ a³lxi²yhu¹ju³ta² a²si³yxau³ju³khai³xa²
 ĩ³yau¹ũ³nx2ta¹wa². Txa²wã¹kĩ³na¹xai²na² hai³txi³
 txa²nũ² Sũ³na² a³lxi²kĩ³ta¹hxai²nxa³hê¹la². Yxã¹ta¹
 Txa²wã¹sũ³na² hi²sen³kxai³lu² a³lxi²nê³lai¹nha²kxai³
 A²ta²ha² hã¹ĩ¹nxe² wê³nhĩn³kxa²
 ũ³hũ¹nê³lain¹ta¹hxai²hê¹la². Txa²wã¹ko³nxe³ti³
 kã³kĩ³ju³ta² wxa²wa²su¹tê³lhi¹jau³su² nxe³ha²kxai³
 ta¹hxai²hê¹la².

11 A³lxi¹nx2ta¹tũ³ka³txã³. Txa²wã¹sũ³na²
 kãin² a³lxi²nê³na³la². Nxe³ha²kxai³
 a³lxi²waun¹yha¹sah¹lxi³hê¹la². 12 A²nũ²kĩ³na¹xai²li²:

— Sũ³na² ĩ²a¹tũ¹xã¹. Nxe³kĩ³kxai²nãn²tu³
 hai³txi³ txa²wã¹yen³nãu³la³ Sũ³na² ĩ²kĩ³ju³ta²
 yũ²nxa³wa². ĩ²kĩ³sxa³kxa²ha³ta³nxãn²txi³
 a³lxi²waun¹yhu¹kĩ³kxai²nãn²tu³ Sũ³na²
 nxũ²kwã¹yxau³nê³lhĩ³nx2na³la². A³lxi²nê³lhxã³
 nxũ²kwã¹yxau²ta³lu²nê³lhĩ³nx2na³la².

13 Sũ³na² Yãu³ka³jxah¹la² ũ³hũ¹nê³kxah³lo²su²
 Jah¹la² ĩ³wi¹ko³nha²ti³hi¹tê³lhĩ³nx2na³la².
 Nxe³ti³hit1tê³ju³ta²nãn²tu³ Sũ³na²
 yxau³ya³nhê³lha²kxai³ txa²wã¹kĩ³na¹xai²na²
 Sũ³na² yxau³ya³kĩ³sa²kxai³ nxe³kĩ³kxai²nãn²tu³
 wi¹ko³nha²hĩ³kĩ³tã³la². 14 Txa²wã¹wĩ³na²
 Si³yxau³tãu³su² tãu³a² A²ta²ha² Je³su²jah³la²
 ĩ³sa²si¹hã³ũ¹nhê³na²hê³la². A²nũ²a²
 yuh³xai²nãn¹tũ³ka³txi³ kĩ³na¹xai²na² yxo²ha³kxa¹
 ko³nxe³ti³ kã³kĩ³ju³ta² ã³wa²su¹tê³lhi¹jau³su²
 nxe³na²hê³la². A²nxe³te²a² txa²wã¹ye³na² ĩ²i²

a²nũ²a² ã³xa² ã³tih³nxai¹ni² nxe³sĩ¹nhxai²na¹hẽ³la².
 15 A²nũ²a² a²ten³te²su² te²an²tu³ e³lẽ³na²
 ã³ye³kxai²nãn²tu³:

— A²ya³la³tu³ Txa²wã¹sũ³na² A²ta²hai²la¹wi¹,
 Je³su²jah³lo²su¹. Nxe³kxai²nãn²tu³ a²nxe³te²su² te²a²
 ha³kxa¹ Sũ³na² ã³ka³lu³sa²sxã³ yxau³nyhu¹sxã³
 yxau³yah³lxi³hĩ³nx2na³la². 16 Nxe³sxã³
 Txa²wã¹sũ³na² a³lxi²nẽ³ju³ta² wi¹kõ³nha²ki³sa²kxai³
 wi¹lain³kxi²nha²ta³lun²ki³sa²kxai³ nxe³ki³tã³la².
 Jã¹nxe³ju³ta² Txa²wã¹sũ³na² kãĩ³to³ju³ta²
 a³lxi²nẽ³jau³xa² so¹lxi³ kãĩ³jah¹lai²la¹wa².
 Nxe³ha²kxai³ txa²wã¹yu³ta² ki³na¹xai²nãn²tu³,
 te²yã¹nxe³sxã³ Sũ³na² a³lxi²ye²ki³sa²kxai³ a²nũ²a²
 ã³xa² a³lxi²yhu¹ye²ki³sa²kxai³ nxe³ki³kxai²nãn²tu³,
 Sũ³na² yxau³ye²ki³sa²kxai³, Sũ³na²
 yxau³ye²nẽ³lha²kxai³ nxe³hĩ³ki³tã³la². 17 Sũ³na²
 a³lxi²ta³lu²nẽ³na³la². Nxe³nẽ³lha²kxai³ yxan¹nãu³a¹
 Je³su²jah³la² a³ka³nxĩ²sxã³ wã³li²tãu³a¹ kãĩ³ki³kxa²
 yã¹nxe³ju³ta² ã³yĩ¹li²nẽ³tu¹wa². Nxe³nẽ³tãu³a¹
 ãu²li²nẽ³lxa³lho³la². Nxe³sxã³ txa²wã¹ha³lo²ai²na²
 yxau²xai³ki³tãu³a² Je³su²jah³la² yxau²xai³ju³ta²
 yã¹nxe² yxau²xai³ki³tu¹wa². 18 Txa²wã¹sũ³na²
 a³lxi²nẽ³jau³su² yxau²xai³ki³kxai²nãn²tu³ hai³txi³
 yuh³lxa³kxi²nha²sxã³ yxau²xai³lhĩ³ki³sxa³wa².
 A³lxi²ta³lu²nẽ³kxai²nãn²tu³ yuh³lxi³ki³ju³ta²
 hxan³kxi²nẽ³lhĩ³nx2na³la². Yxãn¹ta¹
 yuh³lxi³ki³ke³la³te²kxai³:

— Kõ³nxe³ti³ kãĩ³a¹hẽ³na¹. Na¹ju³ta²
 wah³yu³ta² Sũ³na² khãuh³lxa³ti³hit1sa²te³lin¹ji².
 Nxe³ki³kxai²nãn²tu³ yuh³lxi³nẽ³lhĩ³nx2na³la².
 Jã¹nxe³ya³sah¹lxi³txa³hẽ¹la².

— Yuh³lxi³sa³nhã¹. Nxe³ki³kxai²nãn²tu³ Sũ³na²
a³lxi²nẽ³lhxã³ nxũ²kwai³yxau³ta³lu²nẽ³lhĩ³nx2nxa³wa².

19 A²wi¹lhĩn¹na² txa²nũ² Sũ³na²
ĩ³ya³lxi²nẽ³lhãn²ka³tu³ hã²wxãn³txa³nũ²
te²yã¹nxũn³tãu³a¹ Sũ³na² ĩ³ya³lxi²nũn³ki³sa²kxai³
a²nũ²a² ã³xa² ĩ³ya³lxi²waun¹yhu¹ki³sa²kxai³
nxe³hĩ³ki³tã³la². 20 A²nũ²a² ĩ²li³te²su² kxai²nãn²tu³:

— Txa²wã¹sũ³na² a³lxi²na¹nhai¹. Nxe²
e³kxai²nãn²tu³, yxãn¹ta¹ a²e¹nãu³a¹ au³ti³:

— Txa²wã³tã³xa² yxo²kwĩn¹kxi²na¹nhã¹.
Nxe³kxai²nãn²tu³ ki³han³jah¹lo²su²
hĩ³nx2na³la². A²nxe³jah¹lo²su² te²an²tu³
a²wã³tã³xa² a²ye³na²ka³ya³la² yxau²xai³te²su²
te²a² ĩ³ya³lxin²nxa³kxai²nãn²tu³, hai³txi³
Txa²wã¹sũ³nu²la³ txa²wã¹ye³na²ka³ya³la²
ãn³tĩ¹kxi²nẽ³te²su² te²la³ ĩ³ya³lxi²ti³he¹nxe³lhĩ³nx2nxa³wa².
21 Jã¹nxe³jau³xa²sa¹, Sũ³na² ĩ³kwa³na³nẽ³jau³xa²sa¹:

— Sũ³nu²na¹xai²na² ĩ³ya³lxi²san¹kxai²nãn²tu³
wxa²wã³tã³xa² ĩ³ya³lxi²san¹kxa² yã¹nxe³sẽ¹li¹.
Nxe³nẽ³lain¹ta¹hxai²ti³ai¹ti²tu³wa².

5

Ko³nxe³thin¹ko³xai²nãn¹tũ³kã³txa²
ã³sen³sai¹sa²tẽ³ki³jau³su²

1 Jã¹nxe³ju³tai²na²:

— Txa²wã¹sũ³na² Si³yxau³tãu³a¹ hãi¹nxe²
A²hxi²kan¹ta² Si³yxau³tãu³lo³kxah³lo²su²
na³na¹, Je³su²jah³la²sã¹. Nxe³jau³xai²na²
yxo²ĩ²ki³kxai²nãn²tu³ Sũ³na² wẽ³ha³lxi³su²
hĩ³ki³tã³la². Nxe³ki³kxai²nãn²tu³
A²si³yxau³tãu³ãin²txi³ a³lxi², a²wẽ³ha³lxi³nãu³xãin²txi³

a³lxi² nxe³hĩ³ki³tã³la². 2 Sũ³na² a³lxi²ki³sa²kxai³,
wãn³txa² Sũ³na² ĩ³kwa³na³nẽ³jau³xa²
sa²yo²we¹ki³sa²kxai³ nxe³ki³kxai²nãn²tu³ Sũ³na²
wẽ³ha³lxi³nãu³xa² ĩ³ya³lxi²nũ³nhĩ³ki³tã³la².
Jau¹xai²na² wi¹ko³nha²ki³tã³la².

3 — Sũ³na² a³lxi²na¹xã¹. Nxe³ki³kxai²nãn²tu³
ĩ³kwa³na³nẽ³jau³xa² sa²yo²we¹thĩ³ki³tã³la².
ĩ³kwa³na³nẽ³jau³xai²na² hai³txi³ kãu³sxã³
yo²hau³ko³tẽ³jau³sxa³wa². 4-5 Sũ³na²
wẽ³nhe³nẽ³kxe³su² te²ki³na¹xai²na² ha³kxa¹
ko³nxe³ti³ kãĩ³sxã³ yxau²xai³lain¹tũ³ka³txa²
nũ³kxũn³txi³ ã³ne³sen³sai²sa²tẽ³ain¹ki³tã³la².
Sũ³na² yo²ĩ²ki³jau³su² ko³nxe³ti³
kãĩ³sxã³ yxau²xai³lain¹tũ³ka³txa²
ã³ne³sen³sai²sa²tẽ³ain¹ki³tã³la². Nxe³ki³ju³tai²nãn²tu³.
— Je³su²jah³lai²na² Sũ³na² Si³yxau³tãu³a¹
A²ta²hai²la¹xã¹. Nxe³jau³xai²na²
yo²ĩ²ki³kxai²nãn²tu³ te²ki³na¹xai²na² so¹lxi³
ko³nxe³ti³ kãĩ³sxã³ yxau²xai³lain¹tũ³ka³txa²
ã³ne³sen³sai²sa²tẽ³ain¹ki³tã³la².

Je³su² Kris²tu³jah¹la² ĩ³tih³nxe³nẽ³jau³su²

6 Je³su²jah³lai²na² Sũ³na² A²hxi²kan¹ta²
Si³yxau³tãu³lo³kxah³lo²su² Jah¹lai²na²
wxã³kxi²nẽ³ta¹hxai²hẽ¹la². Wxã³kxi²nẽ³ju³ta²
ĩ³yau³xa² ã³nũ¹ha²kxai³, a²ti³ha²yau³xa²
ha³li³hxa³kxi²sxã³ ya³lu²ha²kxai³, nxe³te³lhxã³
wxã³ta¹hxai²hẽ¹la². Hai³txi³ ĩ³yau³xa²
ã³nũ¹ju³ta² so¹lxi³ wxã³ta¹hxai²nxa³hẽ¹la².
Yxãn¹ta¹ ĩ³yau³xa² ã³nũ¹ju³tain²txi³ wxã²,
a²ti³ha²yau³xa² ha³li³hxa³kxi²sxã³ ya³lu²ju³tain²txi³
wxã² nxe³ta¹hxai²hẽ¹la². 7 Sũ³na²

Yãu³ka³jxah¹la² wi¹lhin¹te² Yãu³ka³jxah¹la²
 jau³jau¹xin³ti² wi¹lain³nha²ti³hi¹tẽ³te³lhxã³
 ĩ³tih³nxe³nẽ³jah¹lai²la¹wa², a²ya³la³lyau³xa²
 e³jah¹lo²su²ha²kxai³la². ⁸Oh³nãu³nũ¹ka³nãu³ai²nãn¹ko³xai²na²
 ĩ³tih³nxe³nẽ³te²su² te²a² ha¹li¹ ka³na³ku² te²a²
 ĩ³tih³nxe³nẽ³te²su² na³la². Nxe³te³nah¹lxi¹.
 Txa²wã¹wi³na² Si³yxau³jah¹lain²txi³ ĩ³tih³nxe²
 wãn³txi³khai³su² Je³su²jah³la² Jah¹lain²txi³
 ĩ³tih³nxe² Sũ³na² Yãu³ka³jxah¹lain²txi³
 ĩ³tih³nxe² nxe³nẽ³lain¹na³la². Te²yã¹nxũ³sxã³
 yuh³nãu³an¹ko³xai²na² ĩ³tih³nxe³nẽ³te²su²
 te²a² ha¹li¹ ka³na³ku² te²a² ĩ³tih³nxe³nẽ³te²su²
 nũ³na³la². Nxe³te³nah¹lxi¹. Sũ³na² Yãu³ka³jxah¹la²
 Wi¹lhin¹te² Yãu³ka³jxah¹lain²txi³ ĩ³tih³nxe²,
 ĩ³yau³xain²txi³ ĩ³tih³nxe², a²ti³ha²yau³xa²
 ha³li³hxan³kxi²sxã³ ya³lu²ju³tain²txi³ ĩ³tih³nxe²
 nxe³nẽ³lain¹na³la². Ain¹sxã³ ha¹li¹
 ka³na³ku² te²ai²na² Je³su²jah³la² wi¹lhit¹sxã³
 ĩ³we¹nha²yu³sxã³ ĩ³tih³nxe³nẽ³lain¹na³la². ⁹A²nũ²a²
 ĩ³tih³nxe³nẽ³jau³xa² a²nũ²a² wãn³txi³su² kxan²ti³
 yxo²ĩ²ki³tã³la². Yxãn¹ta¹ Txa²wã¹sũ³na²
 ĩ³tih³nxe³nẽ³jau³xa² ã²la² kãin²jau³xai²la¹wa².
 A²nxe³jau³xai²na² Txa²wã¹sũ³na² Si³yxau³tãu³su²
 tãu³a¹ ĩ³tih³nxe³nẽ³jau³xai²na². A²ta²ha²
 Je³su²jah³la² ĩ³yau¹ũ³nẽ³te³lhxã³ ĩ³tih³nxe³nẽ³na³la².
¹⁰ Nxe³ki³kxai²nãn²tu³ Sũ³na² A²ta²ha²
 yxo²ĩ²ki³kxai²nãn²tu³ Sũ³na² ĩ³tih³nxe³nẽ³jau³xai²na²
 nxũ²kwai³yxau³nẽ³lhĩ³nx2na³la². Yxãn¹ta¹ Sũ³na²
 yxo²ĩ²ki³sxa³kxai²nãn²tu³ Sũ³na² ki³han³te²lot3sxã³
 ĩ³yĩ¹li²hĩ³ki³tã³la². Sũ³na² wãn³txa²,
 A²ta²ha² ĩ³ye³kxi²sxã³ ĩ³tih³nxe³nẽ³jau³xai²na²
 yxo²ĩ²ki³sxa³ha²kxai³la². ¹¹ ĩ³tih³nxẽn³jau³xa²sa¹:

Txa²wã¹sũ³na² Si³yxau³tãu³a¹ ka³te³na² wi¹tãu³a¹
 ũ³hũ¹nẽ³ta¹hxai²hẽ¹la². Nxe³ju³ta² Sũ³na²
 A²ta²ha² Je³su²jah³la² hxi²ka² ka³te³na² wi¹tãu³la³
 hi¹tẽ³ta¹hxai²hẽ¹la². 12 Nxe³ha²kxai³ a²nũ²a²
 i²li³te²su² te²ki³na¹xai²nãn²tu³, Sũ³na² A²ta²ha²
 nxũ²kwai³yxau³nẽ³kxai²nãn²tu³, ka³te³na² wi¹tãu³a¹
 yũ³nẽ³lhĩ³nx2na³la². Yxã¹ta¹ i²li³te²su² te²a²
 Sũ³na² A²ta²ha² nxũ²kwai³yxau²nxa³te²lẽ¹. Hai³txi³
 ka³te³na² wi¹tãu³la³ yũ³te²su² ti³hex1hĩ³nx2nxa³wa².

Ka³te³na² wi¹tãu³a¹ yxau²xai³ki³jau³su²

13 Ũ³wha²li¹lyah³nx2ta¹jau³xai²na²
 wxa²nũ³ka³txi³ i³nxai²na² Sũ³na² A²ta²ha²
 yxo²i²yah³lxin¹tũ³ka³txi³ i³nxai²na²
 ũ³wha²li¹lyah³nx2ta¹wa². Ka³te³na² wi¹tãu³a¹
 yxau²xai³lyah³lxin¹ju³ta² a³la³kxi²sih¹nx2ta¹jau³su²
 nxe³nx2ta¹wa². 14 Nxe³ki³sa²kxai³
 hxi²ka¹ka¹nha²la² Sũ³na² yen³nãu³a¹
 yxau³ye²ki³tã³la². Nxe³ki³sa²kxai³ Sũ³na²
 i³wã³txi³sain³ki³kxai²nãn²tu³, Sũ³na² a²ẽ¹nãu³a¹
 ten³kxa²yã¹nxe³jau³xa² so¹lxĩ³ i³hau³kot3sa²nũ¹sxã³
 i³wã³txi³sain³ki³kxai²nãn²tu³, a²nxe³ki³jau³xa²
 ha³kxa¹ ain³kxi²nẽ³lhĩ³nx2na³la². Ju¹ta²
 wi¹kõ³nha²ki³tã³la². 15 Ain³kxi²nẽ³kxai²nãn²tu³
 a²yen³kxa² i³wã³txi³sain³ki³kxa² a²yxõ²ha³kxa¹
 ũ³hũ¹nẽ³lhĩ³nx2na³la². Nxe³jau³xai²na²
 wi¹kõ³nha²nũ³ki³tã³la².

16 Wxa²nũ³ka³txi³ i³nxai²na² nxe³jah³lxĩ³hẽ¹la².
 Wxa²i²li³te² i³nxã² nĩn¹kxai²nãn²tu³:

— Txa²wã³tã³xa² kõ³nxe³ti³ kãĩ³ain¹na³na¹.
 Yxã¹ta¹ Txa²wã¹sũ³na² ne³wã²na³ũ¹kxe³sxa³kxa²
 kõ³nxe³ti³ kãĩ³ai¹nxa³xã¹. Nĩn¹kxai²nãn²tu³

Txa²wā¹sũ³na² ĩ³ye³kxi¹txai¹nhẽ³la².
 Wxa²wā³tã³xa² ko³nxe³ti³ kã³ain¹ju³ta²
 wxa²wa²su¹tain¹si¹hin¹jau³su² ĩ³ye³kxi¹txai¹nhẽ³la².
 Nĩn¹kxai²nãn²tu³ Sũ³na² hi²sen³kxai³lu²
 wxa²wā³tã³xa² sa²hau³kot³sxã³ ka³ten³yu³ta²
 ũ³hũ¹ain¹tu¹wa², Txa²wā¹sũ³na²
 ne³wā²na³ũ¹kxe³sxa³kxa² ko³nxe³ti³
 kã³ai¹nxa³ha²kxai³la². Yxãn¹ta¹ Txa²wā¹sũ³na²
 ne³wā²na³ũ¹kxe³sxa³kxa² ko³nxe³ti³ kã³ki³sa³ta¹.
 Jã¹nxe³ju³ta² wxa²wā³tã³xa² Txa²wā¹sũ³na²
 ne³wā²na³ũ¹kxe³sxa³kxa² ko³nxe³ti³
 kã³kxai²nãn²tu³ Sũ³na² ĩ³ye³kxi²si¹nxa²ha¹jau³su²
 ĩ³kwa³na³nxa²ti³nxa³lho³la². 17 Wain³txi³
 kã³ki³sxa³kxai²nãn²tu³ ko³nxe³ti³ kã³hĩ³ki³tã³la².
 Nxe³ki³kxa² ha³ta³nxãn²txi³ ko³nxe³ti³ kã³ki³ju³ta²
 Txa²wā¹sũ³na² ne³wā²na³nẽ³lain¹ju³ta³nũ³a²
 yũ³tu¹wa².

18 Yxãn¹ta¹ Txa²wā¹sũ³na² wẽ³ha³lxi³lo³tẽ³kxe³su²
 te²a² yxo²ha³kxa¹ ko³nxe³ti³ kã³sxã³
 yxau²xai³lai¹nxa³wa². A²nxe³te²su² te²a² Sũ³na²
 A²ta²ha² ã³non²ta³kxai¹nha²kxai³, hxi²kan¹txi³
 a²ta³a² ko³nxe³thin¹khaix³jah¹la² ko³nxe³ti³
 kã³ũ¹hai¹nxa³lho³la².

19 Jã¹nxe³ki³ju³ta²:

— Sũ³na² wẽ³ha³lxi³su² ki³tã³na¹. Yxãn¹ta¹
 ko³nxe³ti³ kã³sxã³ yxau²xai³lain¹tũ³ka³txa²
 ha³kxa¹ a²ta³a² hxi²ka² hxi²ka²nãu³lo³nain¹na³na¹.
 Nxe³jau³xai²na² wi¹ko³nha²nũn³ki³tã³la².

20 Nxe³ki³sa²kxai³ Sũ³na² A²ta²ha²
 wxã³ye²nẽ³ju³ta² wi¹ko³nha²nũn³ki³tã³la².
 A²nxe³jah¹la² a³la³kxi²ti³hi¹tẽ³na³la². Txa²wā¹sũ³na²
 Si³yxau³tãu³a¹ wain³khai¹nxe³jah¹la²

wi¹lĩ²ki³txai²la². Nxe³ki³sa²kxai³
 wain³khaix1jah¹lain²txi³ ã³nũ²nxi²sxã³
 yxau³ya³ki³sa²kxai³, a²ki³lha³lxa² Je³su²jah³la²
 Sũ³na² A²hxi²kan¹ta² Si³yxau³tãu³lo³kxah³lo²su²
 jah¹lain²txi³ ã³nũ²nxi²sxã³ yxau³ya³ki³sa²kxai³
 nxe²yxau²xai³ki³tã³la². A²nxe³jah¹lai²na²
 Txa²wã¹sũ³nu²khai³xai²la¹wa². Ka³tẽ³na² wi¹tãu³a¹
 ũ³hũ¹nẽ³jah¹lai²la¹wa².
 21 Txa²wẽ³ha³lxi³nãu³xãi³. Sũ³nu²
 sa²ki³lox3nxe³jah¹la² yxo²ĩ²yah³lxi³txa³hẽ¹la².
 Ta³lu²na¹wa².

Txa²wã¹sũ³na² Wãⁿ³txa²
New Testament in Nambikuára, Southern
(BR:nab:Nambikuára, Southern)

copyright © 2012 Wycliffe Bible Translators, Inc.

Language: Nambikuára, Southern

Translation by: Wycliffe Bible Translators, Inc.

Nambikuára, Southern [nab], Brazil

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Nambikuára, Southern

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

5198f7a7-ab9d-5d69-b112-d94960f81d2a